

# **TUSI TAIALA**

**MO LE PULEA MA LE VA'AIA LELEI O I'A MA FIGOTA**

**O LE AFIOAGA O**

# **FUAILOLO'O MULIFANUA**

**Iuni 11, 1999**

## **SAUNIA**

Pule mamalu a Alii ma Faipule ma tagatanuu o le Afioga o Mulifanua ma le Lagolagosua a le Vaega o Faigafaiva o le Matagaluega o Fa'atoaga ma Faigafaiva.

## **FAASOLOGA**

<b>1</b>	<b>Upu Tomua</b>	<b>3</b>
<b>2</b>	<b>Autu</b>	<b>4</b>
<b>3</b>	<b>Faamatalaga e uiga i le afioaga</b>	<b>4</b>
<b>4</b>	<b>Tapenaga o lenei Tusi Taiala</b>	<b>4</b>
4.1	Feiloaiga Muamua ma le Afioaga	4
4.2	Faatalatalanoaga i Vaega e Tolu	5
4.3	Komiti Faufautua o le Faasao	5
4.4	Pasiaina o le Tusi Taiala	5
4.5	Filifilia o le Komiti o le Faasao	5
<b>5</b>	<b>Fuafuaga Faataatitia</b>	<b>5</b>
5.1	Faigafaiva le talafeagai	6
5.2	Faasalalauina Tulafono a le Afioaga	6
5.3	Ia Faasaina Upega ma Tili mataninii	7
5.4	Ia aoina mai i uta alamea ma faatama'ia ai	7
5.5	Ia faaaina tu'iga ma faamo'a	8
5.6	Ia faasaina fagotaga mai isi afioaga	8
5.7	Ia faasaina le toe lafoai o lapisi i le sami ma le matafaga	8
5.8	Ia faasa ona toe fagotaina mai i'a ma figota laiti	9
5.9	Ia faasaoina ma faateleina amu	9
5.10	Ia taofia le faamamaina o sea i uta i le pa'u matu	10
5.11	Ia taofia le laueseina o oneone mai i le matafaga	10
5.12	Ogasami Faasaoina	11
5.13	Iloiloina le Gataifale mo le Faafaatoagaina o i'a ma figota	11
5.14	Ia unaia faigafaiva i tua'au ma aoaoga	12
5.15	Mana o Talosaga	13
<b>6</b>	<b>Talosaga a le Afioaga</b>	<b>13</b>
<b>7</b>	<b>Toe iloiloina o lenei Tusi Taiala</b>	<b>14</b>
7.1	Otootoga	14
7.2	Fuafuaga faataatitia a le Afioaga ma le Ofisa o Faigafaiva	14
<b>8</b>	<b>Sui Filifilia o le Komiti Faufautua</b>	<b>14</b>
<b>9</b>	<b>Faigafaiva</b>	<b>14</b>

## **1. UDU TOMUA**

O le faaitiitia o i'a ma figota i Samoa e afua mai i le anoanoai o mafuaaga eseese. O nisi o nei mafuaaga e aofia ai;

- le tanumia o vaega o le gataifale mo eleele-fou (fanua)
- le soona fagotaina faa-le-tatau o le gataifale e le afaifaiva
- le faaaogaina o faigafaiva-le-talafeagai
- ma aafiaga mai i afa malolosi (Ofa 1990, Val 1991, Heta 2004) ua tuanai.

O nei faafitauli o loo tulai mai pea i gataifale o si o tatou atunuu ma o loo avea lea ma auala e faaitiitia ai i'a ma figota. O le faaitiitia o nei tamaoiga o le sami e faaitiitia ai foi porotini maua (protein) mo le taumafa tatau (taumafa paleni) mo tagatanuu o Samoa. O se atugaluga tele lea i le Malo o Samoa na faapea ai ona faatino nisi o fuafuaga faataatitia e pei ona faailoaina atu i lalo.

O le tausaga e 1988 na pasiaina ai e le Kapeneta le **Tulafono Autu Tau Faigafaiva** e faamalosia ai le (i) laiseneina o vaa-fagota mo fagotaga, (ii) faasaina le faia o faigafaiva-le-talafeagai i ogasami o Samoa. Peitai ane o nei tulafono uma e lei silafia e le toatele o tagatanuu o Samoa i ia vaitaimi. O se tasi o mafuaaga ona o le toaitiiti ma le toagaogao o le afaifaluga. Ae o se isi mafuaaga ua talitonu le taofi na faigata ona ausia ai lea tulaga ona e lei iai se polokalame i lea vaitaimi e pei o le Polokalame o le Faasao o le Gataifale mo Nuu ma Afioga. O leni polokalame e pei ona faatinoina nei, ua fesoasoani tele i le faa-malamalamaina mo le silisfia e le mamalu o le atunuu o ia tulaga.

I le tausaga 1995 na pasiaina ai e le Kapeneta le **Tulafono Faatonutonu e Faatapulaaina ai le Laiti o I'a ma Figota**. O leni tulafono na pasiaina ma le faamoemoe e tuu avanoa ma fesoasoani i le faasaina o i'a ma figota ua tauau ona mou atu. O le faatapulaaina o le laiti o i'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau e faatupulaia ai le faitau aofai o le tamaoiga o le gataifale.

O **Tulafono Laiti** a nuu ma afioga ua amanaia e le Faamasinoga. O se tasi lea o auala ua tuu sao ai e le Malo le malosi i nuu ma afioga e mafai ai ona o latou molia i le tulafono soo se tagata e le usitaia tulafono ua aiaia i totonu o le Tusi Taiala a le afioga o Fuailolo'o i Mulifanua. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaaia lelei o le gataifale i tulaga o ona tamaoiga ma lona siosiomaga mo se lumanai manuia. O tulafono laiti e soalaupuleina ma autasi iai le Pule Mamalu a Alii ma Faipule o afioga taitasi.

### ***Polokalame o le Faasaina o le Gataifale i Nuu ma Afioga***

O le Polokalame o le Faasao na amataina e le Malo e taua mai lea i le auunaga a le Ofisa o Faigafaiva i le tausaga e 1995. I le amataga mai la o leni polokalame sa faapea ona lagolago malosi ai le Malo o Ausetalia e auala mai i lana AusAID i le faa-tupeina mo le 5 tausaga seia oo mai i le tausaga e 2000 ma faamuta ai loa lana fesoasoani. Peitai na e lei faamuta ai i lea tausaga ona sa tauaveina loa e le Malo o Samoa le faatupeina o leni polokalame taua. I le taimi nei, ua oo atu le afaiga i le 85 nuu ma afioga ua faatinoina ai leni polokalame. Peitai, mai i le 85 lea, e na o le 52 nuu ma afioga o loo tulai malosi ma faatauina pea leni polokalame. O le talitonuga ma le faamoemoe autu o le tele o nei afioga o le silasila lea i le lumanai manuia mo tagata lautele o le afioga aemaise ai o tupulaga lalovaoa.

O le polokalame o le Faasao e galulue soosoo-tauau iai le ofisa ma le afioga i nisi o fuafuaga faataatitia aua se lumanai manuia aemaise o le toe faa-tamaoigaina o le gataifale. I le amataina o leni polokalame e faatinoina ai ni faatalatalanoaga ma vaega eseese o le nuu e pei o le vasega o matai, tina ma taulelea. O nei fefaasoaiga e faailoa mai ai faafitauli o loo faafeagai ma le gataifale o le afioga. E talanoaina foi aafiaga ma mafuaaga o nei faafitauli ma soalaupule ai ni fofo. Ma sa faapea loa ona soalaupule ai e Alii ma Faipule, tagatanuu o le afioga ma le ofisa nisi o fuafuaga faataatitia e foia ai nei faafitauli. O se faataitaga o se fuafuaga faataatia a le afioga i leni polokalame o le faia lea o se ogasami faasao e faasa ona solia, kolosiina pe fagotaina foi.

O nisi o fuafuaga faataatitia e tele ona faaogaina e afioaga mo le pulea ma le vaaia lelei o tamaoaiga (i'a ma figota) o le gataifale e aofia ai le faasaina o;

- vailaau oona
- fanaia
- ava-niu-kini
- tuiga, faamoa, seuga
- i'a ma figota laiti
- upega ma tili mataninii
- lama moli-uila i po

O nisi o fuafuaga o Tusi Taiala i le tele o afioaga mo le pulea tatau ma le vaaia lelei o le siosiomaga o le gataifale e aofia ai le;

- aoina o alamea (crown-of-thorn starfish)
- faasaina o le lauina o le oneone o matafaga
- lafoai o lapisi i le gataifale (matafaga)

O lenei polokalame e taua tele mo le lumanai manuia o Samoa ma ona tagatanuu. O le faaleleia o le siosiomaga ma le faatuputupulaia o le tamaoaiga o le gataifale o se faamoemoe e talitonu e mafai ona faatinoina i o tatou lava lima. E faa-tauaina tele le lagolagosua a le Pule ma le Faamalumaluga a Alii ma Faipule o afioaga i lenei polokalame.

## **2. AUTU**

O le autu lenei sa faatalatalanoaina ma malilie autasi i ai vaega taitasi o le afioaga ;

- 1. Ina ia puipua le siosiomaga o le gataifale ma,**
- 2. Toe faatupulaia le tamaoaiga o le gataifale mo tupulaga o le lumana'i**

## **3. FAAMATALAGA E UIGA I LE AFIOAGA**

O le afioaga o Fuailolo'o e i le itu i matu i sisifo o le motu o Upolu ma o le faitauaofai o ona tagatanuu e tusa ma le 2000, e aofia ai matai, tina ma tamaitai, aumaga ma tamaiti. E le o faitaulia ai i latou ua malaga atu i atunuu i fafo e pei o Niu Sila, Ausetalia, Amerika, ma isi.

O Fuailolo'o, e iai lona aau e amata mai lava i le itu i sasae se'ia pa'ia le itu i sisifo, i le mamao pe a ma le afa maila (1/2 maila). O le umi o le aau, pe a ma le tasi ma le afa maila (1 1/2 maila). O le vaega pito i loloto o le aloalo e tusa ma le 10 – 18 futu i taimi e pe ai le tai, ae 10 – 12 futu le loloto o vaega pito i sili ona papau.

O lenei afioaga, e mamalu tele ona pulega aua e puleaina lelei e Alii ma Faipule o Fuailolo'o. O le aumaga ua matua lava saunia i taimi uma aua le tautuaina o matai. O matai latou te avatua fautuaga lelei mo ni mataupu tau lotoifale o le afioaga.

## **4. TAPENAGA O LENEI TUSI TAIALA**

O lenei tapenaga sa saunia lava e alii ma faipule ma tagatanuu o Fuailolo'o, faatasi ai ma le lagolagosua a le Ofisa o Faigafaiva, o le Matagaluega o Faatoaga ma Faigafaiva. O se ootoga lenei i le tapenaga o lea Tusi Taiala ina ua maea ni fonotaga sa faia, ua taua i lalo.

### **4.1 Feiloaiga Muamua ma le Afioaga**

I le amataga mai o le polokalame, sa faapea ona faatoai mai se finagalo o le Pule Mamalu a Alii ma Faipule i le Ofisa o Faigafaiva e faailoa ai lo latou fiafia e auai i le Polokalame mo le Puipua o le Gataifale, lea na faafesootai mai e Mauisii Mose i le aso 8 o Mati, 1999. O le aso 5 o Me sa tauaofia ai le uluai fono a sui o le Ofisa ma le Afioaga, e faamalalalama ai le polokalame ma aumai ai se finagalo o le afioaga, pe taliaina pe leai. O le fono foi lena sa auai ai Alii ma Tamaitai Ofisa e taliaina aloaia se finagalo o le afioaga i le polokalame. O le maea o lenei feiloaiga muamua na taliaina lelei ai e le afioaga le polokalame.

#### **4.2 Faatalatalanoaga i Vaega i Tolu**

O le taua o lenei faatalatalanoaga, ina ia vaevaeina le afioaga i vaega e iai matai, tina ma aumaga. O nei vaega e tolu sa faatalatalanoaina e sui o le Ofisa o Faigafaiva. O le autu tonu o nei faatalatalanoaga ina ia mafai e le afioaga ona faailoa mai faafitauli o loo aliae mai i le siosiomaga o le gataifale o Fuailolo'o. Sa faapea foi ona sailia ai ma ni aafiaga o nei faafitauli. O ni fofo, aemaise faatinoga ma i latou e faatinoina nei fofo sa faailoa mai.

#### **4.3 Komiti Faufautua o le Faasao**

O le matafaioi a le komiti faufautua o le tuu-faatasia lea o faamaumauga ma faamatalaga mai vaega taitasi, ma sa mafai ai ona latou tapenaina se ata faataitai o le Tusi Taiala.

#### **4.4 Pasiaina o le Tusi Taiala**

O le faagasologa atoa o nei fuafuaga faataatitia a le afioaga e aofia ai foi ma fuafuaga faataatitia e lagolagosua mai ai le Ofisa o Faigafaiva.

O le Tusi Taiala sa tuuina aloaia i le fono a matai, e sui o le komiti faufautua ma sui o le Ofisa o Faigafaiva mo le pasiaina ma amata faatinoina ai loa galuega ma matafaioi a vaega taitasi. O le fono foi lea e filifilia ai loa ma le Komiti o le Faasao, e taitaia le faagaoioiga o fuafuaga ua uma ona faataatitia.

#### **4.5 Filifilia o le Komiti o le Faasao**

O le Komiti o le Faasao sa filifilia mai i vaega taitasi i taimi o faatalatalanoaga, latou te mataituina fuafuaga faataatitia a le afioaga. E maea loa le pasiaina o le Tusi Taiala, ona fesootai lava lea o le Ofisa ma le Komiti i tulaga uma e manaomia ai le fesoasoani e pei ona autasi ma tamauina i le Taiala.

### **5. FUAFUAGA FAATAATITIA**

O fuafuaga faataatitia o ni gaiioiga ua faamoemoe e foia ai faafitauli ua fa'aalia ma faailoa mai e vaega eseese o le afioaga. E lua (2) ituaiga o fuafuaga, ma o le fuafuaga ua aupito sili ona taua o **Fuafuaga Faataatitia a le afioaga.**

O le isi vaega o fuafuaga faataatitia o le Ofisa o Faigafaiva ma o nei fuafuaga, o le tuuina atu lea o fautuaga ma fesoasoani i nisi auala e pei o aoaoga ma le tufaina atu o pepa o faamatalaga i mataupu e fesootai i le gataifale. O galuega uma lava e faatinoina e le Ofisa o Faigafaiva, e ao ona faamaonia e le faatonu lagolago (Assistant Chief Executive Officer) a le Matagaluega o Faatoaga ma Faigafaiva.

O le taimi na faatinoina ai faatalatalanoaga i vaega taitasi, e tele ni mafuaaga sa faailoa mai ae auga lava i le faafitauli ogaoga, o le faaititia lea o i'a ma figota i le aloalo ma le aau o le afioaga o Fuailolo'o.

O mafuaaga ma o latou aafiaga i le siosiomaga o le gataifale sa faapea ona iloiloaina ma sailia. O tali o faafitauli ma fofo, poo auala e foia ai na iloiloaina foi i faatalatalanoaga. E le gata i lea, sa faailoa mai ai foi ma vaega latou te faatinoina nei galuega.

O le vaega i lalo o le a auiliiliina atoatoa atu ai fuafuaga faataatitia sa aoina mai i vaega taitasi ma tuufaatasia e le komiti faufautua ma le lagolagosua a le Ofisa o Faigafaiva.

**Tulafono Autu Tau Faigafaiva (1988)** : O le tulafono a le Malo o Samoa e;

(1) Faasaina ai Faigafaiva-le-Talafeagai.

(2) Faamalositia ai le laiseneina o Vaa-Fagota.

**Tulafono Faatonutonu Mo le Laiti Faatapulaaina o I'a ma Figota (1995)** : O le tulafono lea e faatapulaaina ai le laiti o i'a ma figota, mo le fuaina o mataupega.

**Tulafono Laiti :** O tulafono a nuu ma afioaga ua amanaiaina e le faamasinoga.

### **5.1 FAAMALOSIA TULAFONO FAALENUU E FAASAINA AI FAIGAFAIVA-LE TALAFEAGAI**

Na faaalua e vaega taitasi i taimi o faatalatalanoaga o loo faaauauina pea le faaaogaina e faifaiva o fanai'a, ava niu kini ma vailaau oona i fagotaga. O nei faigafaiva-le-talafeagai ua mautinoa lo latou tulaga ogaoga i le faatamaiaina o le siosiomaga o le gataifale, e pei o i'a laiti aemaise o nofoaga taua mo meaola o le sami e iai amu. O le faaleagaina o le gataifale mai nei ituaiga auala faaigafaiva e umi ma tele se taimi e toe faafoi ai i le lelei sa iai i aso ua mavae.

#### **FUAFUAGA FAATAATITIA A LE AFIOAGA**

Talu ai ona o le tulaga pagatia ua iai le gataifale o lenei nuu o Fuailoloo i Mulifanua, o lea ua ae ai se finagalo autasi i le Komiti faufautua ina ia matua faamalosia tulafono a le afioaga e faasaina ai faigafaiva-le-talafeagai e pei o fanai'a, ava niu-kini, ma vailaau oona. O le puipuiga ma le faamamaluina o nei tulafono o le a i aao lava o le pule mamalu a alii ma faipule faatasi ai ma le lagolagosua a tagatanuu o le afioaga.

#### **FAUTUAGA**

Ia toe faamalosia ma faamamaluina tulafono ua taua i lalo a le afioaga mo le faasaina o faigafaiva le talafeagai.

#### **TULAFONO**

Mo le mamalu o le atunuu atoa ma tagatanuu o Fuailolo'o i Mulifanua:

Ua matua faasaina lava faigafaiva le talafeagai e pei o fanai'a ava niukini, ma vailaau oona ona toe faatinoina i gataifale o le afioaga o Fuailolo'o i Mulifanua.

#### **FAASALAGA**

Mo tagata o le afioaga e solia lenei tulafono, o le a faasalaina i le silia atu ma le 10 pusaapa poo le 10 aumatua.

O tagata mai isi afioaga o le a molia sao i le Tulafono Autu Tau Faigafaiva ma le Tulafono Laiti a le Afioaga.

#### **FUAFUAGA FAATAATITIA A LE OFISA O FAIGAFAIVA**

O le a fesoasoani le Ofisa i le tufatufaina o pepa o faamatalaga i faigafaiva-le-talafeagai aemaise ai le faatinoina lea o suesuega ma moliaga o tagata ua faamaonia lona faationina o nei faigafaiva i le faamasinoga a le Malo o Samoa.

### **5.2 FAASALALAUINA TULAFONO A LE AFIOAGA**

O faasalalauina i leitio, televise ma nusipepa o nisi ia o auala talafeagai lelei e faalauteleina ai tulafono a le afioaga. O le a silafia ai e le mamalu o le atunuu, malamalama ma manino lelei i le faatauina ma le puipuia o le siosiomaga o Fuailolo'o. O le Komiti o le Faasao o le a latou faamaopopoina ma tapenaina faasalalauina o tulafono.

Autu o le Faasalalauina: "Puipuiga o le Gataifale o Fuailolo'o"

### **5.3 IA FAASAINA UDEGA MA TILI MATANINII**

O le faaaogaina o uega ma tili mataninii ua maitauina le tele o i'a ninii ua faatama'ia ai. Ua iai le talitonuga o le a oo atu i se tulaga faaletonu i'a maua pe a faaauau pea le faatinoina o nei ituaiga faigafaiva. O le a oo

ina faaitiitia i'a ma figota e mafai ona oo atu lo latou lapopoa e maua ai le avanoa e tautuufua ma fanafanau.

#### **FUAFUAGA FAATAATITIA A LE AFIOAGA**

Ua faailoa mai e le komiti, o le faaogaina o upega ma tili mataninii, o se tasi lea o mafuaaga ua faaitiitia ai i'a maua i le gataifale. O lea ua aiaia ai loa se tulafono ina ia faasaina ai upega ma tili mataninii ona toe faaogaina i fagotaga i gataifale o le afioaga. Ua faapea foi ona faaalua mai e le afioaga lo latou matua lagolagoina o le Tulafono Faatonutonu o Faigafaiva a le Malo ua iai nei mo le faatapulaaina o mataupega ma tili.

#### **TULAFONO**

Ua matua faasaina lava ona toe faaogaina upega tatao e i lalo ifo o le 2 inisi (50 mm) ona mataupega, faapea foi ma tili, ia le i lalo ifo o le 1.2 inisi (30 mm) i gataifale o Fuailolo'o

#### **FAASALAGA**

Soo se tagata o le afioaga e solia lenei tulafono o le a faasalaina i le \$100.00

Mo tagata mai isi afioaga o le a molia sao ma faasalaina i le Tulafono Faatonutonu o faigafaiva a le Malo o Samoa.

#### **FUAFUAGA FAATAATITIA A LE OFISA O FAIGAFIIVA**

O le lagolagosua mai a le Ofisa o Faigafaiva e ala i lana polokalame fesoasoani, o le tuuina atu lea o faamatalaga e saga faamautuina ai lenei tulafono.

### **5.4. IA AOINA MAI UTA ALAMEA MA FAATAMA'IA AI**

O le alamea o se meaola o le ituaiga o le aveau ma e nofo i luga o le aau. O lenei meaola e na te aina meaola ninii ua taua o POLIPE o loo tutupu mai ai amu. A oo ina faateleina alamea, o le a latou faatamaiaina se vaega tele o le aau ma avea ai o se tulaga pagatia. O le a aafia ai le tele o meaola o loo faalagolago i le aau mo nofoaga ma meaai. E le mafai ona faaumatia le alamea i le vaevaeina o lona tino i le sami, aua e mafai ai e nei itu tino ona faatupuina mai nisi alamea fou.

E pau le auala e mafai ona tapeina ai lenei meaola o le aoina mai lea i uta i le pau mautu e faamamago, tanumia, pe susunuina foi. E mafai ona faaogaina lona tino pe a mago, o se faalelei eleele mo faatoaga ma mea toto.

#### **FUAFUAGA FAATAATITIA A LE AFIOAGA**

Ua faailoa mai e le afioaga, o le alamea o se tasi lea o mafuaaga o le pe o le amu o le gataifale. E aafia ai foi le soifua o tagata faifaiva ma ua fautuaina ai e le komiti faufautua ina ia faatinoina le aoina i uta o lenei meaola faalafua ma faatama'ia ai.

#### **FAUTUAGA**

Ua fautuaina e le komiti faufautua, o le aoina mai i uta o alamea, o le a faatinoina lava e tagatanuu o le afioaga. O le a aoina tai ono masina alamea ma aumai i le pau matu e faatamaia ma faamamago ai, ae faaogaina mo faalelei eleele.

#### **FUAFUAGA FAATAATITIA A LE OFISA O FAIGAFIIVA**

E leai se polokalame a le malo ua fuafuaina e totogi ai le faatamaiaina o alamea, vagana ai ni fautuaga e fesoasoani atu ai le Ofisa i auala e talafeagai e tineia ai lenei meaola faalafua, e ala lea i pepa o faamatalaga ua maea ona saunia.

### **5.5 IA FAASAINA TUIGA MA FAAMO'A**

O amu ua maituina lona taua i le siosiomaga i le gataifale ona ua mautinoa ua avea lea ma nofoaga mo le anoano o meaola o le sami. Afai o le a faatamaiaina amu o lona uiga ua afaina foi le tele o meaola o loo nonofo ai. O tu'iga, faamo'a ma seuga o nisi nei o fagotaga le talafeagai ua matua faaleagaina ai amu

aemaise ai figota laiti. Afai ae faaauuina pea lenei ituaiga faigafaiva, o lona uiga o le a sili atu ona tele se afaina o amu o loo fai ma nofoaga (alofaga) o i'a ma figota.

#### **FUAFUAGA FAATAATITIA A LE AFIOAGA**

Na faaalua e vaega taitasi le tatau ona faia o se tulafono e faasaina ai tuiga, faamoa ma seuga i le gataifale o Fuailolo'o, aua ua mautinoa le faaleagaina uma ai o meaola ninii o le gataifale. Ua matua lagolagoina e le komiti lenei tulafono

#### **TULAFONO**

Ua matua faasaina ona toe faatinoina faigafaiva-le-talafeagai e pei o tuiga, faamoa, suega poo nisi lava faigafava-le-talafeagai i gataifale o Fuailolo'o.

#### **FAASALAGA**

O i latou uma e solia lenei tulafono o le a molia sao i le Tulafono Autu Tau Faigafaiva (1988) a le Malo o Samoa.

#### **FUAFUAGA FAATAATITIA A LE OFISA O FAIGAFIIVA**

O le a fesoasoani mai le Ofisa i le faamautuina ma le faamalositia o lenei tulafono. O le a mafai foi ona tuuina atu ni pepa o faamatalaga e uiga i mea uma ua taua. E lagolagoina foi e le Ofisa soo se fuafuaga a le afioaga ua talafeagai lelei ma le tulafono mo le faasaina o amu.

### **5.6. IA FAASAINA FAGOTAGA MAI ISI AFIOAGA**

Ua maitauina le toatele o tagata mai isi afioaga ua latou fagotaina gataifale o le afioaga o Fuailolo'o. ua le gata i lea, ae ua latou faatamaia foi le gataifaale i ni auala le talafeagai ma ua utiuti ai le tamaoiga e maua mai i aua ma aloalo o loo faalagolago iai le afioaga.

#### **FUAFUAGA FAATAATITIA A LE AFIOAGA**

Ua iai se fuafuaga a le afioaga, o le a faia se tulafono e faasaina ai tagata mai isi afioaga ona toe fagotaga i gataifale o Fuailolo'o. O le autu moni o lenei tulafono, ona o nei faigafaiva mai isi afioaga o loo latou aumaia faigafaiva-le-talafeagai ma faatinoina i lo latou gataifale, ua tele ai le ogaoga o le faaleagaina.

#### **TULAFONO**

Ua matua faasaina lava tagata mai isi afioaga ona faatinoina faigafaiva-le-talafeagai e pei o fanai'a, ava niu kini ma vailaau oona, tuiga, faamoa poo nisi lava faigafaiva-le-talafeagai i le gataifale o Fuailolo'o.

#### **FAASALAGA**

O i latou uma e solia lenei tulafono o le molia sao i le Tulafono Laiti o faigafaiva a le afioaga.

#### **FUAFUAGA FAATAATITIA A LE OFISA O FAIGAFIIVA**

O le a fesoasoani atu le Ofisa i le faamalositia ma faamautuina o lenei tulafono.

### **5.7 IA FAASAINA LE TOE LAFOAI O LAPISI I LE SAMI MA LE MATAFAGA.**

O le faasaina o le lafoai o lapisi ma otaota i le sami, ua avea ma mafuaaga o le faateleina ai o namu, ma manunua ai nisi o faifaiva i atigiapa, atigifagu ma uamea. Ua faapena ona avea ma puna'aga o faamai ma avea ai foi ma nofoaga le talafeagai mo le ola lelei o ia ma figota i le gataifale.

#### **FUAFUAGA FAATAATITIA A LE AFIOAGA**

O le a faamalositia e le afioaga le faasaina ona toe lafoai lapisi i le sami ma le matafaga, ae saunia ni galuega mo le afioaga atoa, e faamama ai lapisi, e pei o le fausia o ni fata-lapisi poo le eliina o se lua e lafoai iai.



**TULAFONO**

Ua matua faasaina ona toe lafoai otaota ma lapisi e pei o pepa iila, uamea, atigi apa, atigi fagu, meaola mamate, ogalaau, ma soo se ituaiga lapisi, e aafia ai le siosiomaga o le gataifale o Fuailoloo.

**FAASALAGA**

Soo se tagata o le afioaga e solia lenei tulafono o le a faasalaina i le \$50.00, poo le 1 le aumatua (puaa). O tagata mai isi afioaga e solia lenei tulafono o le a molia sao i le Tulafono Laiti a le afioaga.

**FUAFUAGA FAATAATITIA A LE OFISA O FAIGAFAIVA**

O faamatalaga eseese e faatatau i aafiaga o le aafiaga o le gataifale ma ona tamaoiga, o le a fesoasoani atu ai le Ofisa e ao-tauina le afioaga i le taua o le lafoai o otaota ma lapisi i nofoaga talafeagai.

**5.8 IA FAASA ONA TOE FAGOTAINA MAI I'A MA FIGOTA LAITI**

O le tele o afioaga ua latou faaalai mai le toatele o faifaiva latou te fagotaina mai i'a ma figota laiti. O le mafuaaga lea ua vave faaitiitia ai i'a ma figota, ona ua le maua se avanoa e tautuufua ma fanafanau ai nei meaola.

**FUAFUAGA FAATAATITIA A LE AFIOAGA**

Ua iai le fuafuaga a le afioaga, o le a lagolagoina le tulafono o faigafaiva mo le lapopoa faatapulaaina e fagotaina ai i'a ma figota.

**TULAFONO**

Ua matua faasaina ona toe fagotaina i'a ma figota laiti mai le gataifale o Fuailolo'o i Mulifanua, e pei ona faaalai e le komiti.

**FAASALAGA**

O tagata o le afioaga e solia lenei tulafono, o le a faasalaina i le \$50.00 po o le 1 le aumatua (puaa) pe sili atu foi.

O tagata mai isi afioaga o le a molia sao i le Tulafono Faatonutonu a le Malo o Samoa.

**FUAFUAGA FAATAATITIA A LE OFISA O FAIGAFAIVA**

O le a fesoasoani le ofisa mo le tapenaina o tulafono laiti e faasaina ai fagotaga o i'a ma figota e laiti ifo nai lo le fua faatapulaa o i'a ma figota. E le gata i lea, ua maea tapenaina foi pepa o faamatalaga e faamalamalama ai le puipuiga o le fagotaina mai o i'a ma figota laiti.

**5.9 IA FAASAOINA MA FAATELEINA AMU**

O le puipua ma le faasaoina o amu, o se itu lelei lea mo le faasaoina o i'a ma figota o loo faalagolago iai mo meaai ma nofoaga. O le faia o se ogasami faasaoina ma le taofia o faigafaiva-le-talafeagai, o nisi ia o fuafuaga tatau ma le talafeagai mo le faateleina o amu

**FUAFUAGA FAATAATITIA A LE AFIOAGA**

O le faia o se ogasami faasaoina, o se auala na faailoa e le afioaga e ala i le komiti, e mautinoa lona lelei mo le faateleina o amu, i'a ma figota. Na faailoa foi lo latu finagalo, o le a mataituina ma vaia lelei lea nofoaga e Alii ma Faipule aemaise o ona tagatanuu.

**FUAFUAGA FAATAATITIA A LE OFISA O FAIGAFAIVA**

O le a fesoasoani le Ofisa i le faamalamalamaina o itu lelei mo le faateleina o amu, aemaise o le tufaina atu o pepa o faamatalaga e faalauiloa atili ai lenei mataupu.

#### **5.10. IA TAOFIA LE FAAMAMAINA O SEA IUTA I LE PA'UMATU**

O le figota o le sea, o se tasi o matai'ai a le atunuu. Ua maitauina lona faaitiitia i le gataifale. E le gata i lea, ae ua tauau ina mou atu ona o le soona fagotaina ma le le faaeteete e tagata faifaiva, aemaise o le lauina i le paumatu. Afai o le a faaauuina pea lea gaoioiga, e mautinoa o le a le toe maua se sea i gataifale o le afioaga.

#### **FUAFUAGA FAATAATITIA A LE AFIOAGA**

Na faaalua e le Komiti o le auina mai uta o pausea ma faalala ai, o se tasi lea o mafuaaga o le faaitiitia o nei figota i le gataifale. O lea ua ae ai se tofa i le Komiti e faia se tulafono ina ia taofia ai le toe lauina mai i uta o nei figota ma faamamaina ai.

#### **TULAFONO**

Ua matua faasaina ona toe lauina mai i uta pau sea pe faamamaina foi i le paumatu

#### **FAASALAGA**

O soo se tagata o le afioaga e solia lenei tulafono o le a faasalaina i le sala-tupe e \$50.00, poo le 1 le aumatua (puaa).

O tagata mai isi afioaga, e molia sao i le Tulafono Faaatonutonu a le Malo.

#### **FUAFUAGA FAATAATITIA A LE OFISA O FAIGAFAIVA**

Ua matua lagolagoina malosi e le Ofisa le tulafono lenei a le afioaga ma fesoasoani ai i le tuuina atu o pepa o faamatalaga e faamautuina ai lenei fuafuaga tatau.

#### **5.11 IA TAOFIA LE LAUESEINA O ONEONE MAI LE MATAFAGA.**

O le tele o le oneone ua laueseina e tagata mo a latou galuega fai, ma le tanuina o o latou tafa-fale, ua avea ma tulaga faigata ma le tele ai o apitagalu ma matafaga tafia. O le faaauuina pea o le asuina ma le laueseina o nei oneone, o le a avea ma auala e le toe vaaia ai le tele o meaola o le gataifale o faaogaina nei nofoaga ma o latou ofaga.

#### **FUAFUAGA FAATAATITIA A LE OFISA**

Na taua e le afioaga e ala mai i le komiti, o se tulaga le talafeagai tele le laueseina o oneone mai le matafaga. Ma ua mataituina lelei foi, soo se tagata na te solia lenei aiaiga, o le a faia loa iai le finagalo o le afioaga.

#### **TULAFONO**

Ua matua faasaina soo se tagata na te lauina pe asuina oneone o le talafatai o le afioaga o Fuailolo'o i faiga le talafeagai ma le gataifale.

O tagata ese e manaomia le Pemitā faataga e tusa ai ma aiaiga a le Malo.

#### **FUAFUAGA FAATAATITIA A LE OFISA O FAIGAFAIVA**

O le a fesoasoani malosi le Ofisa o Faigafaiva i le faamautuina o fuafuaga a le afioaga ma lagolagoina le mataupu e uiga i le laueseina o oneone mai le gataifale o Fuailolo'o i Mulifanua.

#### **5.12 OGASAMI FAASAOINA**

O se vaega o le gataifale ua faasaoina e le tatau ona toe aafia i ni faigafaiva. O le avea o se nofoaga o le gataifale ma nofoaga faasao, e ao ona aafia ai le malupuipua o le siosiomaga ma ona tamaoaiga i figota ma i'a.

O lenei nofoaga faasao, o le a faasaoina ai amu, aau, faapea foi ma i'a ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea lenei faasao ma punaaga o i'a ma figota o loo aumau i vaega faasaoina, ma o le a tafefea atu o latou fua fanau ma faatupuina ai nisi meaola i nofoaga ua le maua ai nisi i'a ma ni figota. O le a le pine ae manuia ai lo tatou atunuu faapea foi tupulaga o le lumanai.

#### **FUAFUAGA FAATAATITIA A LE AFOAGA**

- Galulue faatasi ma le lagolagosua a le Ofisa o Faigafaiva i le iloiloina o se vaega talafeagai o le gataifale e avea ma vaega faasaoina
- Talanoaina ma auiliiliina le lipoti ma ia faia se faaiuga i le faavaeina o le ogasami faasao.
- Faatino le mataituina, tausiga ma le vaaia lelei o le ogasami faasao.

#### **FUAFUAGA FAATAATITIA A LE OFISA O FAIGAFAlVA**

- Faatinoina le iloiloga o le tulaga talafeagai o se vaega o le gataifale e avea ma vaega faasaoina.
- Saunia le lipoti mo le tuuina aloaia atu i le Komiti o le Ofisa ma le Fono.

#### **TULAFONO**

Ua matua faasaina soo se tagata ona uia, taele, solia, pe faatinoina foi soo se ituaiga o faigafaiva poo se isi lava gaoioiga i totonu o lenei ogasami faasao i Fuailolo'o.

#### **FAASALAGA**

Soo se tagata e solia lenei tulafono o le a faasalaina i le 10 aumatua (puaa).  
O tagata mai isi afoaga o le a molia sao i le Tulafono o Faigafaiva a le Malo.

### **5.13 ILOILO LE GATAIFALE MO LE FAFAATOAGAINA O I'A MA FIGOTA**

O le tufaina atu ma le faafaatoagaina, e faatatau lea i le auina mai o ni figota poo ni i'a mai isi atunuu ma tufaina atu e faaola i se ogasami ua talafeagai. O le faafaatoagaina ua faatatau lea i le faaolaina o figota i se nofoaga ua saunia mo nisi atinae e faatupuina ai figota aua le toe faatamaoigaina o le gataifale mo taumafa o se afoaga. O nei auuala faa-atinae e moomia ai lava le galulue faatasi ma le faamaoni o le afoaga ina ia ausia se taunuuga lelei.

#### **Faamatalaga Faaopoopo o le toe tufaina atu o Figota**

O le tufaina o figota i le tele o atunuu o le Pasefika ua mautinoa le tele o ni faamanuiaga na mafai ona seleseleina e nei atunuu. I Fiti, na mafai ona toomaga iai tagata i le aano o le aliao e avea ma mea taumafa. O Iona atigi na mafai ona faatauina atu e gaosi ai faamau o ofu i fale gaosi mea. I le Atu Kuki e tusa ma le 280 aliao na tufaina atu iai ma na mafai ona maua mai ai se aofaiga e tusa ma le 200 tone o atigi aliao i le tausaga na faatauina i fale gaosi faamau. I le 1990 na tufaina atu ai i sami o le motu o Namua i Aleipata le 40 o aliao, ma na faatamaiaina i le afa malosi o Ofa.

I le tele o vaega o le aloalo ma le aau o Samoa o loo maua ai figota e pei o le pae, asi ma le tugane. O nei figota ua mautinoa lo latou faaititia talu ai o le soona fagotaina e tagata mo taumafa ae ua faapena foi ona faatamaiaina o latou nofoaga e afa malosi. I le tele o nofoaga ua le toe maua ai nei figota, pau le

faamoemoe o le aumaia lea o ni figota mai nisi atunuu ma tufaina atu iai aua le faaolaina i nei vaega o le gataifale

#### **FUAFUAGA FAATAATITIA A LE AFIOAGA**

- \* Galulue soosootau'u ma le afaigaluega a le ofisa o faigafaiva i le faatinoina o le iloiloga pe talafeagai ma lelei le gataifale mo le faafaatoagaina o figota.
- \* Auiliiliina o le lipoti i suesuega o le gataifale, ma ia faia se faaiuga i le faatinoina o nei atinae i totonu o Fuailolo'o.
- \* Galulue faatasi mo le puipua o nei atinae, ma vaai lelei tagata o loo latou faaatamaiaina pe solia tulafono e faatatau i le faasao.

#### **FUAFUAGA FAATAATITIA A LE OFISA O FAIGAFAlVA**

O le a oo atu se Alii Ofisa mai le vaega suesue e suesueina le gataifale o le afioaga, ina ia faamaonia le talafeagai mo le faaolaina ai o ni figota. O le a tuuina atu ni figota pe afai o le a faamaonia le talafeagai o nei nofoaga mo ia atinae.

- \* Fesoasoani mai le Ofisa e ala lea i le vaaia lelei ma le mataituina o le sologa lelei o le tuputupu ae o figota.
- \* Saunia ni aoaoga mo le faamalamalamaina o olaga faanatura o nei figota.

### **5.14 IA UNAIA FAIGAFAlVA I TUAUU MA AOAOGA**

E mafai ona faaleleia le tamaoaiga o i'a ma figota maua i aloalo, aau ma vaega o le gataifale ua faaleagaina, pe afai ae faaititia le fagotaina o nei vaega o le gataifale. O se tasi lea o auala e faaleleia ai le tamaoaiga o le gataifale, o le fagotaina o ogasami o le gataifale e lei fagotaina lava, aemaise o tua'au mamao.

#### **FUAFUAGA FAATAATITIA A LE AFIOAGA**

Ua iai le talitonuga i le Komiti e ao ona unaia ma faamalositia faigafaiva i tuaau ma aau mamao ina ia tuumamaina ai le fagotaina o i'a ma figota o le aau ma le aloalo. Ae le gata i lea ae o le a mafai ai ona toe faatupulaia ma faaleleia le tamaoaiga o le tele o vaega o le gataifale, aemaise i le aloalo, ua faaleagaina. Ua talosagaina foi le Ofisa o Faigafaiva ina ia faatinoina se aoaoga i auala tau faigafaiva e aoaoina ai le autautai o le nuu ma ia faatautaia e se Alii Ofisa o Faigafaiva ua iai se tomai faapitoa i mea tau faigafaiva.

#### **FUAFUAGA FAATAATITIA A LE OFISA O FAIGAFAlVA**

Talu ai ona o le tele o nuu e leai ni vaa e talafeagai mo fagotaga i tuaau, o lea ua taumafai ai le Ofisa o Faigafaiva e saili fesoasoani mo se auala e faafaigofie ona maua mai ai ni vaa talafeagai mo lea faamoemoe. O le a iloiloaina foi e le Ofisa o Faigafaiva manaoga i auala tau faigafaiva e ao ona fesoasoani ai mo le aoaoina o le mamalu o le autautai o le afioaga. O itu taua o le a aafia i nei aoaoga e iai le teuina ma le vaaia lelei o i'a, saogalemu i luga o le sami, tausiga o afi o vaa, faasuina o i'a, ma isi lava mataupu taua.

#### **FAAMATALAGA FAACPOPO**

Vaa mo fagotaga i tuaau: O le leai o ni vaa talafeagai mo fagotaga i tuaau o le ala lea ua avea ma vaegase i le unaia o faigafaiva i tuaau. E leai se vaa fagota e i le va o le alia ma le paopao, ma o se vaa i lea va ua talitonuina o le a talafeagai mo faigafaiva i tuaau. I saililiga a le Ofisa o Faigafaiva i se vaa talafeagai, ua filifilia ai le vaa e i le va o le 14-16 futu. O lona tau e \$9,800, tuufaatasi i ai ma lona afi (15HP) ma nai mea fagota, o le taula, ofu faaola mo le saogalemu i luga o le sami, ma foe. O loo iai se fesoasoani a le Faalapotopotoga a le Luni a Europa (ED) mo le faatupeina o le 65% o le tau atoa o le vaa (\$9,800), o le 35%, o le sao lea o se afioaga poo se faalapotopotoga ua auai i le polokalame a le Vaega o Faigafaiva.

O lenei ituaiga vaa e mafai ona faaauvaaina e ni tagata se toalua pe toatolu foi, ma e mafai ona faaogaina

lenei vaa i faigafaiva i tuaau. O le a faia foi ni aoaoga mo le saogalemu i luga o le sami, teuina ma le vaaia lelei o i'a, tausiga o vaa atoa ai ma le faaogaina o mea fagota.

### **5.15 MANA O TALOSAGA**

O talosaga ma talitonuga tuufaatasi faalelotu o se tasi lea o faamoemoega ua talitonuina lona taua aua le puipuia ma le faasaogalemuina o le siosiomaga o le gataifale ma ona tamaoaiga.

#### **FUAFUAGA FAATAATITIA A LE AFIOAGA**

O le sao taua o le aufailotu o le unaia lea ma faamalosiau i tagatanuu ina ia latou faatauina le puipuia ma le faasaoina o le siosiomaga o le gataifale ma ona tamaoaiga. O se sao taua tele le tapueina o finagalo o tagata ina ia galulue faatasi aua le foia o faafitauli o loo aliae mai i le siosiomaga o le gataifale ma ona tamaoaiga. Na taua e vaega eseese o le afioaga le aoga ma le taua o talosaga mo le foia o faafitauli o loo feagai nei ma faigafaiva ma le siosiomaga o le gataifale o Fuailolo'o i Mulifanua. Sa lagolagoina foi e le Komiti lenei fautuaga ma fautuaina ai le taupati faatasi o le aufailotu ma le mamalu o le afioaga.

#### **FUAFUAGA FAATAATITIA A LE OFISA O FAIGAFIIVA**

O le a mafai ona tuuina atu ni fesoasoani mai le Ofisa o Faigafaiva mo le mamalu o le Aufailotu e ala i pepa o faamatalaga ma tautalaga ina ia fesoasoani i le fausiaina o a latou lauga ma aoaoga mo le puipuia ma le faasaoina o le siosiomaga o le gataifale ma ona tamaoaiga.

## **6. TALOSAGA A LE AFIOAGA**

Na talosaga le afioaga e ala i sui na auai auai i le fonotaga ma le Ofisa o Faigafaiva i taimi o faatalatalanoaga i Vaega e Tolu, ma faamautuina uma nei talosaga e le komiti ma tuuina mai ai loa i le Ofisa mo le toe faamautuina atili ma faataunuuna ai, pe a maea ona taliaina aloia lenei Tusi Taiala e le pule mamalu a Alii ma Faipule i le fono tele e faia i le Aso 11 o Luni 1999. O talosaga uma sa tuuina mai o loo faailoa atu i lalo.

- Ogasami Faasaoina
- Vaa Fagota
- Tilapia
- Faisua, Aliao, Alii ma isi Figota
- Aoaoga i mea tau faigafaiva (fausiaina o mea fagota, tausiana o afi o vaa, tausia ma le vaaia lelei o faisua, ma isi aoaoga)

## **7. TOE ILOILOINA O LENEI FUAFUAGA TATAU**

### **7.1 OTOOTOGA**

O le toe iloiloina o lenei fuafuaga tatau, e sailia ai le agai i luma ma lona toe suesueina ina ia faailoa le taua ma le aoga o lenei polokalame i totonu o nuu ma afioaga, aemaise o ni auililiga maumaututu, i le tulai mai o galuega fai a le afioaga ma le ofisa i le faataunuuna o fuafuaga faataatitia e pei ona taua i luga. O lenei foi iloiloga e lipotia ai le manuia ma ni faaletonu o le polokalame talu ona faavaeina i le afioaga.

### **7.2 FUAFUAGA FAATAATITIA A LE AFIOAGA MA LE OFISA O FAIGAFIIVA**

Ua iai le maliliega a le Komiti faufautua a le afioaga ma le Ofisa o Faigafaiva o le a toe auililiina lenei Fuafuaga Tatau pe a maea le ono(6) masina talu ona pasia lenei tusi i le Fono Tele i le aso 11 Luni 1999. O le a toe feutaga'i le Komiti ma le Ofisa i se aso o le a atofaina pe a atoa le 6 masina.

## **8. SUI FILIFILIA O LE KOMITI FAUFAUTUA**

### **KOMITI A MATAI**

Tauti Simi (pulenuu)  
Togia Tulagiu (peresitene)  
Mafua Safune  
Moananu Fano  
Mauinatu  
Puefua Falefa

### **KOMITI A AUMAGA**

Iuni  
Lapalapa  
Iese  
Usoalii  
Oli

## **9. FAIGAFAIVA**

### **FAAMATALAGA**

O le faitau aofai o tane faifaiva e fagogota i le sili atu ma le tasi le aso ole vaiaso	40 – 60
O le faitau aofai o tina faifaiva e fagogota i le sili atu ma le tasi le aso o le vaiaso	20 – 30
O le aofaiga o tagata fagogota i tuaau mai le tasi le aso o le vaiaso	10 – 20
O le aofaiga o paopao e faaogaina mo faigafaiva i totonu o le afioaga	30 – 60
O le aofaiga o alia fagogota o loo faaogaina mo faigafaiva a le afioaga	2
E le faatagaina ni tagata fagogota mai isi afioaga ona fagogota i le gataifale o Fuailolo'o	

## **KOMITI O LE FAASAO**

